

Restauracion di ex Botica Aruba a finalisa

Den presencia di Minister di Cultura, Stichting Monumentenfonds Aruba (SMFA) a celebra e finalisacion di e proyecto di restauracion di e monumento na Steenweg 19 conoci manera ex Botica Aruba of El Mercado.

SMFA sigur kier agradece tur cu a traha na e proyecto aki di un of otro forma. E proyecto a keda ehecuta p'e contartista Van Kessel Havenbouw NV. E diseño di e edificio tabata den man di Archiosa y Archiosa hunto cu JOOST ABC tabata encarga cu e supervision di e proyecto.

Tambe nos ta gradici sr. Evert Bongers kende a haci e investigacion di e historia di e bunita monumento aki y a skiribi e articulo: *Botica Aruba, bedrijf van heren van stand*. Sigur un danki na tur e familiarnan cu a yuda tambe cu informacion y fotografianan di antes p'asina nos por a logra e proyecto aki. Por ultimo tambe un danki na Walter Mohammed nos boluntario cu a fotografia e edificio pa nos durante diferente fase di e proyecto.

Den e caso di Steenweg 19 a restaura solamente e parti exterior di e monumento. E motibo pa cu esaki ta cu ainda no tin un huurdo p'e edificio. Unabes cu Stichting Monumentenfonds Aruba logra sera un acuerdo di huur lo cuminsa cu e di dos fase p'asina adapta e interior di e edificio na necesidad di e usuario.

Generalmente prome cu haci compra di un edificio tin algun rekisisto cu SMFA ta existi pa por compra e edificio, un di nan hopi importante ta cu mester tin un huurdo na termino largo pa por sigui cu e proceso pa adkeri e monumento.

Den e caso di e edificio monumental aki na Steenweg na momento di compra no tabatin un huurdo, pero debi n'e circunstancianan y cu e edificio lo a core peliger di cay den man di comerciantenan cu lo a basha esaki abou, SMFA a tuma e decision di compra p'asina por salba esaki.

E edificio na Steenweg 19 ta un monumento proteha, construi na 1925 pa Addison Winfield Croes. Na aña 1935 hunto cu Gustave Nouel a cuminsa cu Botica Aruba den e edificio y esaki a fungi como botica te na november di aña 1985 caminda cu lamentablemente e botica mester a sera su portanan. Despues Palais Hindu a compra e edificio y na aña 1993 'El Mercado' a habri su portanan.

Awor despues di seis aña cu SMFA a adkiri e edificio, nos ta sumamente orguyoso di por a restaura e edificio aki y hibe bek na su forma original den cual el a keda construi den añanan binti. Un monumento cu hopi detaye y decoracion.

Nos a logra restaura tur esakinan, habri e balcon di e edificio bek y trece bek e decoracionnan den estilo 'gingerbread' tanto n'e bentananan como n'e balcon. Den e forma aki Stichting Monumentenfonds Aruba por garantisa cu e monumento di Steenweg lo tey pa futuro generacionnan por conoce tambe e historia di Botica Aruba.

